

## *En 't geburen in dee dage*

*dat den keizer Augustus orneeren; de heele weerd mos zik laoten oop schriewen.*

- 2 Disse eerste volkstellinge geburen eer Quirinius, landvoogd van Syrië was.*
- 3 En almaol gungen ze hen, um zik oop te geewen, 'n ieder naor zien eegen stad.*
- 4 En ook Jozep gung van Galilea, oet de stad Nazareth, naor Judea, naor de stad van Davied, dee Betteljem hedden, umdat hee oet 't volkshoes van Davied was,*
- 5 Um zik oop te geewen, met Maria, dee an um verzeg was en wat jongs te meute zag.*
- 6 Mer het geburen, dow ze dao wadden, dat eer tied was kömmen,*
- 7 En zee kreeg eeren eerstgeboren Zön en wikkeln Um in deuke, en lèè Um in ne krub, umdat er vuur eer gen plaatste was in de harbaarge.*
- 8 Dao wadden schepers in dee kontreien, dee in 't veeld waken bi'j eeren drop schäöpe,*
- 9 In eer stön der nen engel des Heeren bi'j eer en de heerlijkheid Gods beschienen eer en zee kregen nen grooten schrik oop de hoed.*
- 10 Mer den engel zèè tegen eer: Wèèst nich bang, want zeet, ik verkönning ow ne groote bliedschop, dee vuur al het volk zal wèèn:*
- 11 Dat ow vandage in de stad van Davied den Zaoligmaker is geboren, den Christus den Heer is.*
- 12 En dit zal ow 'n teeken wèèn: i'j zölt 'n Wichtken vinnen, dat in deuke is wikkeld en in ne krub lig.*
- 13 En inees was ter bi'j den engel ne groote koppel engeln, dee God lofzungen en zèèn:*
- 14 Eere an God in 'n allerheuwsten en vrèè oop eer' an de mensken, dee van goon willen zint.*
- 15 En dow de engeln wier oopstegen wadden nao 'n Hemmel, zèèn de schepers tegen meka: Lao'w hen gaon naor Betteljem, um te zeen, dat gebuurd is wat 'n Heer ons verkönnigd hef.*
- 16 En zee gungen rap en vunnen Maria en Jozep en 't Wichtken in de krub.*
- 17 En dow zee 't zaggen, maken ze 't woord bekend, wat eer aower dit Kind zeg was.*
- 18 En al degennige, dee 't heuren, verwondern zik aower wat de schepers tegen eer zèèn.*
- 19 Mer Maria ontheul al disse weur en aowerdachn ze in eer hatte.*
- 20 Non gungen de schepers wiet vot; zee verheerliken en prezen God um alns wat ze heurd en zeen hadden, juus zoo as tegen eer sprökken was.*

*Uit: G.B. Vloedbeld,  
„De Eawengellies”, Lucas II: 1-20.*